

Un vèspre dounc , en la Crau vasto ,
 Lou bèu trenaire de banasto
 A l'endavans d'Ourrias venié dins lou draïou.
 Lou tron d'uno chavano acipo
 Lou proumier aubre que lou pipo ,
 E , l'iro bourroulant si tripo ,
 Veici coume parlè lou doumtaire de biou :

— Es belèu tu , fiéu de baudrèio ,*
 Que l'as enclauso , la Mirèio ?
 En tout cas , o 'speia , d'abord que vas d'alin ,
 Digo-ie'n pau que m'enchau d'elo
 E de soun mourre de moustelo ,
 Pas mai que dóu vièi tros de telo
 Que te cuerbe la pèu !... l'auses , bèu margoulin ?

Vincenet ressautè ; soun amo
 Se revihè coume la flamo ;
 Soun cor ie boumbiguè coume un fio grè que part : *
 — Panto ! vos dounc que te coustible ,
 E que moun arpo en dous te gible ?
 Ie fai en l'alucant , terrible
 Coume quand , afama , se reviro un léopard .

E de soun iro li trambleto
 Fasien ferni si car vióuleto .
 — Sus la gravo , dis l'autre , anaras mourreja !
 Car , as li man trop mistoulino ,
 E noun sies bon , raubo-galino ,
 Que pèr gibla'n brout d'amarino ,
 Pèr camina dins l'oumbro , e pèr gourrineja !

— O, coume torse l'amarino,
 Respond Vincèn qu'eiçò 'nverino,
 Vau torse toun galet !... Ve ! ve ! fuge, se pos,
 Fuge, capoun, qu'ai la maliço !
 Fuge, o, Sant Jaque de Galiço !
 Reveiras plus ti tamarisso,
 Car vai, 'quest poung de ferre, embreniga tis os !

Mereviha de trouva 'n ome
 Sus quau enfin sa ràbi gome :
 — Un moumen ! ie respond lou vaquié regagnous,
 Un moumenet, moun jouine tòchi,
 Qu'abren la pipo !... E de sa pòchi
 Tiro un boursoun de pèu de bèchi,
 E'n negre cachimbau qu'embouco ; e desdegnous :

— Quand te bressavo au pèd d'un ourse,
 T'a jamai counta Jan de l'Ourse,
 Ta bóumiano de maire ? à Vincèn diguè 'nsin.
 I'a Jan de l'Ourse, l'ome double,
 Que, quand soun mèstre, emé dous couble,
 Lou mandè fouire si restouble,
 Arrapè, coume un pastre arrapo un barbesin,

Li bèsti tóutis atalado,
 E su'no pibo encimelado
 Li bandiguè pèr l'èr, emé l'araire après !
 E tu, marrias, bonur t'arribo
 Qu'apereici i'a gen de pibo !... *
 — Levariés pa'n ai d'uno ribo,
 Grand porc ! n'as que de lengo ! E Vincèn, à l'arrèst,